

Der Karusellchesmann (Orthographie angepasst)

1. Ehr Hären un Mamsellcher, kutt her vun fäns un noh,
der Mann me'm Karussellche, Pitt-Jüppchen, dä eß do!
Pitt-Jüppchen driecht am Räddeche, sing Frau die schleiht de Trumm,
de Urgel hält Janettche un Settche die Lavumm.
Jedes Pädche kritt ne Jung, Füßche, Schimmel, Bläß ov Brung

Refrain: Tschimmla, tschimmla, hopsassa, tschimmla, tschimm, Partie!

2. Wann Kirmes oder Maat eß, dann kütt der Pädchesmann
Met singer gröme Wagekeß en jedem Dörpchen an.
Druß lore wie de Pürke de Köpp un och de Stätz
Vun all dä hölze Stirke, wie laach uns do et Hätz!
Kinder, Va un Uhm un MKöhn rofe, juhzen: „Och wie schön!“

Refrain: Tschimmla, tschimmla, hopsassa, tschimmla, tschimm, Partie!

3. Wer nor en Ställche un noch su ärm eß dran,
muß Kirmesweck und Geldche doch för de Pädcher han.
Dann, süht dä dat Vergnöge, wat et de Kinder mäht,
su durch de Looch zo fleege op ehrem hölze Päd,
trick dä Al der letzte Fuß us dem Wammes noch erus.

Refrain: Tschimmla, tschimmla, hopsassa, tschimmla, tschimm, Partie!

4. Do sitz als wie ne Ritter un hinger sich de Mäd
Der Meisterknääch, der Pitter, gar stolz op singem Päd.
Se hält in faß ömschlunge, hä stich met singer Lanz
Vör all dä and're Junge grad meddsen durch de Kranz.
Und at Kohstalls-Annemarie juhz un hälz der Pries en de Hüh.

Refrain: Tschimmla, tschimmla, hopsassa, tschimmla, tschimm, Partie!

5. Hät't Jüppche voll e Büßche un eß de Kirmes uus,
spazeere Schimmel, Füßche fruh en ehr hölzen Huus.
De Jungen un de Mädchen sin dröm wahl ärg bedröv
Bes Jüppche met de Pädcher zum Avschied inne röf:
„kumm'n ich widder met Bläß un Brung, hät jed's Mädche singe Jung.“

Refrain: Tschimmla, tschimmla, hopsassa, tschimmla, tschimm, Partie!

